

HIIBRU TEEB

Ki jiin Hiibru teeb gbouŋ na po

Sooe din sob gbouŋ na tur Yiisaweira nba tee Juu teeb. Juu teeb sanleere tee Hiibru teeb. Ŋamme din di biak Yiisaweiu paak, ki li ji din tenn waan nan bin nyik Yiisa weiu.

Yennu nba turit u mɔmaan u Bija Yiisa ni bianinba

¹ Yaayoo ni, Yennu din jikit yoo bonchiann nan sɔnii bonchianne ki te ki sokiniinba piak teen timm Juu teeb yeejamm; ² ŋaan motana u te ki u Bija nba ki u gannɔ a wun yent bonsiar kur nae pak nan timm. U din te ki u Bija maŋe nan durinya na kur. ³ Ŋooe tee Yennu mɔŋ mɔŋ ninnauŋ, ki yentir Yennu maŋ yentu na, ki dia durinya yaka kur nan u mɔmaan nba mɔk paŋ. Waa din tun linba saa te ki niib n la nyikinchab bi biit paak yoo nba na, ki u ji kar Yabint Yennu niidiitu po, Yendouŋ ni.

Ki jiin Yennu Bija paŋ po

⁴ Yennu nba te ki u Bija maŋ sann gbeŋ gar malakanba sana bianinba na, nnae ki u Bija maŋ set garib. ⁵ Kimaan Yennu daa ki mi yet malakasoo a:

“Fine tee n Bija, ki dinnae ki n teen a Baa.”

Yennu bia ki mi pak malakasoo po a:

“N tan sii tee u Baa, ki u tee n Bija.”

6 Yennu nba din tan yaa wun baar nan u Bija, wunba tee bonnankara yur tingbouŋ na ni yoo nba, ki u gbouŋ yet u po a,
 “Li kpaa talas ki Yennu malakanba kura n jiantɔ.”

7 Ŋaan malakanba na po ŋarin ŋɔɔ Yennu din yet a:

“U te ki u malakanba tee sei, ki bia teemm ki bi tee mupeenu.”

8 Ŋaan u yet u Bija na ŋarin a:

“Yennu, a naan na sii be mɔkmɔk nan mɔkmɔk. Ki ŋante sii tee a naan dammir.

9 Faa loon ŋant ŋaan ki ki loon biit na paak te ki min Yennu ganna ki tura parpeenn bonchiann ki gar maa tur a yɔɔsnba bianinba.”

10 Yennu gbouŋ bia din yet a

“Yennu, pinpiik niwa fine din nan tingbouŋ na, ki nan sanpaak nan a mɔŋ nii.

11 Bi tan saa kpowa, ŋaan fin lek sii yɔɔ be-e; bi kur tan saa kpete ki chat nan chinchenn na,

12 ki fan pɔbimm nan baauŋ na,

ki bin lebit nan chinchenn na.

Ŋaan fin ŋarin tee yomme yoo kur, ki a manfoor na kaa gbennu.”

13 Tɔn, Yennu daa ki mi bet malakasɔɔ a:

“Karin n niidiitu po

mɔkmɔk nan maa tan saa jii a datai ki teemm a taakpakita.”

14 Li paak, malakanba tee bee? Bi kur tee sei nba jiantir Yennu-e, ki ŋɔɔ Yennu tuumm a bii sommit niib nba saa la tinnu na.

2

Ki jiin tinnjaann po

¹ Li kpaá talase ki tin gbiint barmónii nba ki ti din gbat na fanu ki tan daa kɔ́jitiri. ² Maan nba ki malakanba din mɔ́n ki tur ti yeejamm na tee barmóniie, ki wunba din ki sak ki weir tuu la tubdatu nba jaŋɔ́e. ³ Li paak, ti-i kii sak ki gbiint tinnjaann maŋ labaár fanu, ti saa teen nlee ki nyi tubdatu ni? Ti Yomdaano tɔ́ŋo din doŋ mɔ́n tinnu labaár maŋ, ki binba gbat na din wannit a li set tee barmóniie; ⁴ ki Yennu nba tuun bakitnauŋ nan yaarlituk toona nan nyina, ki bia teen niib u Seyeeŋ piinii u loomm ni bíaninba nae pukii u siara bi wannu maŋ paak.

Ki jiin wunba yen tinnu na po

⁵ Durinya nba baat ki ti piak li po na, Yennu din ki yaa malakanbae tee li yudammi. ⁶ Li sob Yennu gbouŋ ni siarboor a:

“Yennu, nisaarik tee bee ki a dukii u po; u mun tee bee ki a baka be u ni?”

⁷ A din te ki u pɔ́ malakanba boor waaminna, ki bia te ki u la dontir nan paku,

⁸ ki te ki u yen bonsiar kura.”

Li yet a Yennu din teen nisaarike “bonsiar kur yudaano.” Li want nan u yen bont kurewa, ŋaan mɔ́tana nisaarik daa ki yent bonsiar kuri.

⁹ Ŋaan ti laat Yiisa-e. Ŋɔ́ɔ́e ki Yennu din te ki u pɔ́ malakanba boor yoo waaminna, a wun gaar soɔ́ kur paak ki kpo, ŋɔ́ɔ́ Yennu ninbatinu ni na. U kuun biak dinu maŋ paak ki Yennu te ki u la dontir nan paku. ¹⁰ Yennu nba nan bonsiar kur

ki bia dia li kur na, ηooe jii u waas bonchiann ki koomm u naan na ni, ki li took u boor a wun te ki bi tinnu daano Yiisa-ii setiki tee bi Tinntoo nan barmonii, u biak dinu paak.

¹¹ ηooe te ki nisaarii teen popeendamm, ki ηoo nan ηamm kur ji taan ki mək Baa yenokoo. Li paake ki Yiisa ki tiin fei nan wun yiimm u naa waasi. ¹² U bet Yennu a, “N saa wann n niib faa tun ηamm nba ki turin, ki saa dont a sann bi lakinn ni.”

¹³ U bia yet a, “N tan saa teen Yennu yada,” ki bia yet a, “Min nan waas nba ki Yennu turin nae be na.”

¹⁴ Ton, Yennu waas nba tee nisaarii na paak, Yiisa mun din tee nisaarika nan ηamm na, a u kuun ni wun tan biir Sintaanii nba mək kuun paη na, ¹⁵ ki nyinn binba tiin kuun jaηmaanii na bi jaηmaanii maη ni. Bi din tee jaηmaanii yommie bi manfoa kur ni. ¹⁶ Barmoniie, li ki tee malakanba kaa ki u sommiti, ηaan Abraham yaabonae ki u sommit. ¹⁷ Linba na want nan li din kpaa talase wuu tee nan u naa waas na u binbeη kur ni, ki teen bi manntoyudaano nba tee ninbatinu daano, ki bia tee barmonii daano, ki jii u moη ki teen maruη ki tur nisaarii Yennu boor, ki wun nyik chab bi biit. ¹⁸ Ki u saa fit somm binba yaa bin koo jinjammii ni, kimaan u tiouη din dii biak, ki jinjammii bia jammowa.

3

Yiisa-e tee nijaann ki gar Moses

¹ N naa waas nba tee Yennu niib ki u ganni na, ii dukii Yiisa po, wunba ki Yennu din tumoo

a wun teen manntoyudaano ti Yenjiantu sonu ni na. ² Moses nba din tee barmonii toontunno Yennu gaateeb sinsuuk ni bianjinba na, nnae ki Yiisa mun tee barmonii toontunno Yennu nba ganno na boor. ³ Ŋamaaroɛ jaŋ nan bii teeno baakir ki gar ŋaak nba ki u maa na; nnae ki Yiisa jaŋ nan bii teeno baakir ki gar baa teen Moses bianjinba na. ⁴ Ŋaak-i taŋi see, soɛ sennir; ki Yennu-e sent bonsiar kur. ⁵ Moses din tee barmonii toontunno Yennu gaateeb sinsuuk ni, ki wann linba ki Yennu yaa wun tan pak sianyoo na. ⁶ Masia ŋarin tee barmonii daano nba yen Yennu ŋaak mage ki tee u Bija. Ti-i mok parcheenn nan yuugontir ti dindann paak, ŋann timme tee Yennu gaateeb maŋ.

Yennu niib foon labaar

⁷ Li paak, ii sak man Seyeeŋ nba yet bianjinba na a:

“I-i gbat Yennu kunkor dinna,

⁸ yaa daa nyar i tuba nan i yeejamm nba din nyar

bi tuba bianjinba

ki kon nana, ki bikini,

baa din be muuk ni yoo nba na.

⁹ Yennu din yet a, ‘Bi poŋ din la maa tun linba kur

ki saa jaŋ bina piinna na,

ŋaan leŋe ki bi din bikinin.

¹⁰ Ŋanne din te ki n donn wutoor niib maŋ paak

ki yet a, Bi para ni, bi yetima, ki ki waa n sonii.

¹¹ N din donn wutoor ki betib a bi kan mi baar maa bo yaa n turib foon tiŋ nba na ni.’ ”

¹² Ton, n yooɛnba, ii bann i yan ni ki soɔ daa tee biitdaano ki konit yada ki tan mann ŋmat

poor ki nyik manfodaano Yennu na. ¹³ Ŋaan ii sommit leeb man daar n tuu daar, taa daa be ti manfoor ni yoo nba na, ki biit daa kpanni ki i tee tubkangbata. ¹⁴ Kimaan ti-i dia ti sinsinn yada na chib ki saa baar ti manfoor joontu, timm nan Masia sii tee toontunnanleebe.

¹⁵ Nnae ki bi din sob Yennu gbouŋ ni a:
 “I-i gbat Yennu kunkor dinna,
 yaa daa nyar i tuba nan i yeejamm nba din nyar
 bi tuba bianinba,
 ki din kon nan Yennu ki yeto na.”

¹⁶ Ki lamme din gbat u kunkor ŋaan kon nanao ki yeto? Ŋamm kaa din tee binba nyii Ijipt ki Moses tee bi toondaano na-a? ¹⁷ Ki lamme biak ki Yennu wutoor din doo bi paak ki saa jaŋ bina piinna na? Li ki tee binba din tun toonbiit, ki tan kpo muuk ni na kaa-a? ¹⁸ Yennu daa din bet lamme a, “Bi kan mi baar maa bo yaa n turib foon tiŋ nba na ni.” Li din tee binba yet u mob nae. ¹⁹ Li paak, bi din ki fit koŋ tiŋ maŋ ni, kimaan bi yadakaarin paak.

4

¹ Ton, Yennu ji tur timme molor maŋ a tin la foon nba ki u din pak li po na. Li paak, ii bann i yanni man ki daa te ki soo n tan koŋ foon maŋi. ² Ti gbat barŋanii na nan baa mun din gbatir bianinba nae, ŋaan li din ki turib nyooti, kimaan baa din gbatir, bi ki gaarir nan yada. ³ Li paak, timm nba teen yada na, ti la foon maŋa. Li din tun nan Yennu nba yet bianinba nae a:

“N wutoore doo, ki n betib a

bi kan ban koo tij nba ni ki n bo yaa n turib foon na.”

Ŋaan waa din tan yeen linba na, ki soo ki u tun u naamii toona ki gbenna. ⁴ Kimaan Yennu gbouŋ ni siar po li poŋ yet daaŋanlore daar maŋ po a, “Yennu din nyik u toona kur ki foi daaŋanlore daar.” ⁵ Ŋaan ki u bia yet nna a, “Bi kan ban koo tij nba ni ki n bo yaa n turib foon na.” ⁶ Binba din gbat barŋanii na sinsinn na din ki la li foon, kimaan bi din yêŋ Yennu mobe. Li paak, nisiab be ki tan saa la foon maŋ. ⁷ Yennu bia senn daleer ki yi daar maŋ “Dinna.” Ki bina bonchiann din gar, ki Yennu te ki Defid yet li po nan laa poŋ pak biaŋinba na a:

“I-i gbat Yennu kunkor dinna, yaa daa nyar i tuba.”

⁸ Joosua-i diŋi turib foon, Yennu ji bo kan pak daleer po. ⁹ Li paak, foon dasiar bia daa be ki tee Yennu niib yar, nan waa din foi daaŋanlore daar biaŋinba na. ¹⁰ Kimaan wunba la Yennu foon maŋ, u nyik u toonae nan Yennu nba din nyik u naamii toona biaŋinba na. ¹¹ Li paak, ŋaant man ki tin yabir ti moŋ ki la foon maŋ, ki ti soo tan daa koŋit nan baa din yêŋ Yennu mob ki koŋir biaŋinba na. ¹² Yennu momaan maŋ tee barii nba foe, ki mok paŋ, ki bia di ki gar jukbanjiak nba ŋma moi ŋanlee na. Yennu momaan fit ŋma ki koo baat nisaarik seek nan u manfoor boor ni, ki koo baat u tukita nan u kpaba beesin ni, ki koo bokitir u dudukit nan u par ni bibikit. ¹³ Bont kur doo yeenin nie, ki Yennu nba tan saa bu bi buut na ninbina laatir; ki siar kaa ki bori.

Yiisa-e tee ti manntoyudaanjaann

¹⁴ Ijaant man ki tii dia ti yada nba ki ti fiit wann na kenken, kimaan ti mok manntoyudaanjaann, hooe tee Yennu Bija Yiisa, wunba poŋ gar saan Yennu tiŋ boora na. ¹⁵ Ti manntoyudaano maŋ ki tee wunba kan fit tint ninbaauk ti butuŋ paak kaa, ŋaan u moŋ din la bikinu sonii booru kur ni, nan taa mun laat biaŋinba na, ŋaan u lek din ki tun biiti. ¹⁶ Li paak, ŋaant man ki tii mok parcheenn ki baar Yennu nba tee burchindaano na naangbouŋ boor, ki la ninbatinu nan sommir ki lin sommit yoo nba ki ti loonir.

5

¹ Ton, mannteeb yudaano kur nba ki bi ganno niib sinsuuk ni na, bi sennoo a wun gaar u leeb paake, kii mann mannu bi biit paak, kii teen Yennu. ² Ijaan u moŋ nba tee butimoo sonii bonchiann ni na paak, u sii fit dia binba poor yan ki kpet sonu na soon nna, ³ ki u moŋ nba tee butimoo na paak, li kpaa talas ki wun mann mannu u moŋ toonbiit paak nan waa mann niib toonbiit paak biaŋinba na. ⁴ Soo ki fit nyint u moŋ a wuu tee mannteeb yudaano, see ki Yennu ganno, nan waa din gann Aaronn ki teeno mannteeb yudaano biaŋinba na.

⁵ Nnae mun, Masia din ki nyinn u moŋ ki donn u moŋ a wuu tee manntoyudaano, ŋaan Yennu-e din yeto a:

“Fine tee n Bija; dinnae ki n teen a Baa.”

⁶ Ki siar po u bia yet a:

“A sii yoo tee manntooe, Melkisedek paabu ni.”

⁷ Tɔn, Yiisa nba din be tingbouŋ na ni yoo nba na, u din mei Yennu ki barimo, ki bui nan ninnyuut, Yennu nba saa fit fato kuun ni na boor. Waa din baakit Yennu na paak, ki Yennu gbat u miaru. ⁸ U tee Yennu Bijae, ŋaan u lek dii biake, Yennu moŋaku ni, ⁹ ki tan gbenn biak dinu maŋ, ki te ki binba kur saak u moŋ na la tinnu nba kaa gbennu. ¹⁰ Ŋanne ki Yennu yiino mannteeb yudaano, Melkisedek paabu ni.

Yada lunu kpaanii

¹¹ Ti bo saa pak Masia nan Melkisedek po bonchiann, ŋaan li paar nan ki ti wanni, kimaan i ki bant li paak yiami. ¹² Nna yoo li ji bo kpaal talas ki yii tee wannteebe, ŋaan i bia loon ki soŋ n wanni Yennu moŋmaan pinpiik ni soŋni na. I bia daa ŋan nan biime, i ki jaŋ nan jeŋmankati. ¹³ Wunba daa moŋ biin tee bibunne, ki daa ki bann yentinu wannu na fanu. ¹⁴ Ŋaan jeŋmankat tee saakab yare, ŋamme tuu tumii ki bann bonbiir nan bonŋann bokitu.

6

¹ Li paak, ŋaant man ki tii dia saakayan kii tumii Masia barii kii saa toonn; ki ŋamm tumii u barii bonchiann ki puki pinpiik ni wannu na po; li ji ki kpaal talas bin ŋamm wanni a, nyikin toonbiit nba tee kuun soŋu, ki teen Yennu yada, ² ki bia wanni Yennu nyunwuru po, nan niyiinu niib paak, nan kpeemm fiiru po, nan

tubdatu nba kaa gbennu na po. ³ Yennu-i sak, ti saa saan tɔɔnna.

⁴ Masiaweira nba yêtu u weiu, li tan sii paar nan bin jen ki lebit bi dudukit. Sianyoo bi din tuu be Yennu maŋ yentu nie, ki gaar bi tora nba tee Yennu Seyeeŋ na, ki lemm Yendɔuŋ ni piiniiwa, ⁵ ki din tuu mi Yennu mɔmaana na manu po, ki mi durinya nba baat na paŋ po, ⁶ ŋaan ji tan yêtu Masia weiu. Li ji paar nan bin jen ki lebit bi dudukit, kimaan bi ŋamii kpi Yennu Bija maŋe dapunpunn paak ki dintɔ fei paanu ni.

⁷ Tɔn, tiŋ nba ki saak baa li paak ki li maakit ki tee jeet teen binba ŋammitir na, Yennu-e teen piisin tiŋ maŋ paak; ⁸ ŋaan tiŋ maŋ-i pia kunkonii nan mɔbiit, li ki mɔk nyɔɔti. Li kan yukir ki Yennu saa porir mɔb ki lin di muu ki biir.

⁹ Ti naa walonkai, taa lek piak linba na, ŋaan ti ki mɔk birsuk i po. Ti mi nan i benu nae chee, ki i mɔk tinnu. ¹⁰ Yennu-e ŋan, ki kan tamm yaa tun linba ki turo, koo yaa loonɔ biaginba ki somm Masiaweira, ki bia daa sommitib na. ¹¹ Ti loon ki i sɔɔ kur n yabir u mɔŋ paake mɔkmɔk nan li joontu, ki yaa mɔk dindann nba na n teen mɔnii ki turi. ¹² Ti ki loon ki yii tee gbannyakdammi, ŋaan ti loon ki yii tee binba teen Masia yadae, kii mɔk sukuru, ki tan gaar linba ki Yennu senn mɔsonn li po na.

Ki jiin Yennu mɔsonn nba kaa birsuk na po

¹³ Yennu nba din senn u mɔsonn tur Abraham yoo nba na, u din sat mɔb a u tan saa tun waa senn mɔsonn nba nawa. Sɔɔ ki be ki chee

Yennu tiog; li paak, u din jii u moŋ sanne ki sat mɔb. ¹⁴ U din yeto a, “Li tee barmoniie, n set saa teen piisin a paak ki bia tura yaaboona bonchiann.” ¹⁵ Abraham din mɔk sukurue, ki tan gaar linba ki Yennu senn a u tan saa turo na. ¹⁶ Nirɔ-i sat mɔb, u tuu jii wunba garo sanne ki sat, ki mɔb nba ki u sat na n kpi moniok kur. ¹⁷ Ton, binba din yaa bin gaar Yennu nba din senn mɔsonn nba na, u din loon wun wannib nan u kan mi lebit u dudukiti; li paak ki u din sat mɔb ki pukin u mɔsonn maŋ paak. ¹⁸ Ton, bona ŋanlee nba kaa lebitu na be ki wann nan Yennu set saa gbeen u mɔsonn maŋa. Li paak, timm nba chiar saan u boor ki tinn na mɔk parcheenn, ki gaar dindann nba be ti toonn po na chib. ¹⁹ Dindann nba ki ti mɔk na tee manfoor jaantarik nba dia ti manfoor fanu nae. Li tee dindann nba gar Yendouŋ ni diiuk kaaruk nie ki koo diiuk maŋ kasii boor na. ²⁰ Yiisa din gaar ti paak ki teen sonliitoo, ki gar saan diiuk maŋ ni, ki teen ti manntoyudaano mɔkmɔk nan mɔkmɔk, ki tee Melkisedek paabu ni manntoo.

7

Ki jiin Yennu manntoo Melkisedek po

¹ Melkisedek maŋ din tee Salem doo bate ki bia tee Yabint Yennu manntoo. Abraham nba din tan nyii tob nba ki u kon nyann batnba banna na, ki Melkisedek cheto ki teen piisin u paak; ² ki Abraham nyinn bona piik ni yennkoo, waa kon fat bont nba na kur ni ki turo. (Melkisedek sann maŋ paak tee a,

“Yentinu Bat,” U din tee Salem doo bate; ki Salem paak tee parmaasir, li paak ki u bia tee “Parmaasir Bat.”) ³ Labasiar ki be ki want Melkisedek baa po, koo u naa po, koo u yeejamm po. Labasiar kaa ki want u maru po, koo u kuun po. U naan Yennu Bijae ki yoo tee Yennu manntoo mookmook nan mookmook.

⁴ Li paak, i la waa tee nijaann bianjinba, kimaan ti yeejajaann Abraham din nyinn waa kon fat bona nba tob ni piik ni yennkoo ki turu. ⁵ Ki sennu din wann a Liifai teeb yaaboona nba tee mannteeb na n tuu gaar bi niib Juu teeb nba mok linba, li bona piik ni yennkoo, naan bi niib maŋ mun bia lek din tee Abraham yaaboonae. ⁶ Melkisedek din ki tee Liifai teeb yaaboonn kaa, naan u din gaar bona piik ni yennkoo Abraham boor, ki bia teen piisin ŋoo Abraham nba din gaar Yennu moosona na paak. ⁷ Mooniok kaa nan niro nba teen piisime tee nijaann ki gar wunba gaan piisin maŋ. ⁸ Mannteeb nba din tuu gaan niib nba mok linba li bona piik ni yennkoo na din tee nisaariie ki tuu tan kpo; naan Melkisedek, wunba din gaar Abraham bona piik ni yennkoo na naan be, nan Yennu gbouŋ nba wann bianjinba na. ⁹ Ti saa fit yet a yoo nba ki Abraham din nyinn u bona piik ni yennkoo na, u yaaboona Liifai teeb nba din tan gaan bona piik ni yennkoo maŋ, mun din mi bi bona piik ni yennkoo nyinnu, ¹⁰ kimaan baa lek daa din ki mar Liifai na, naan ti saa fit yet a yoo nba ki Melkisedek din chet Abraham na, ŋoo Liifai din be u yeeja Abraham maŋ ni.

¹¹ Yennu din tur Juu teeb sennu ki wann Li-

ifai teeb bi mannu toona nba sii tee biaginbae. Ki Liifai teeb maṅ toona-i diṅi be fanuie, li din bo kii kpaa talas ki manntogano, wunba ki nyii Aaronn maaru ni ṅaan see Melkisedek setu ni na n baari. ¹² Kimaan yoo nba ki mannteeb yudantuk lebitu din tuu tan baar ki bin lebit na, sennu mun bia din tuu lebite, ¹³ ki ti Yomdaano Yiisa, wunba tee manntogano maṅ nyii boorganu nba ki bi soṛ ki mi tun mannu toonn na nie. ¹⁴ Soṛ kur poṅ mi nan ṅoo Yiisa nyii Juda booru nie, booru nba ki Moses din ki mi pak siar bi po ki jiin mannteeb po.

Ki jiin manntoo nba tee nan Melkisedek na po

¹⁵ Yoo nba ki manntogano nba tee nan Melkisedek na din tan baar nae ki ti mantik bann barii maṅ paak. ¹⁶ Ṽooe tee manntoo, ki nisaarik sennii ni kaa ki u teen manntoo, ṅaan manfoor nba kaa gbennu na paṅ nie ki u teen manntoo. ¹⁷ Kimaan bi din soṛ u po Yennu gbouṅ ni a, “A sii yoo tee manntooe, Melkisedek paabu ni.” ¹⁸ Li paak, sennkperu na ji din bakine, kimaan li ji ki mək paṅi, ki bia ki mək nyooti. ¹⁹ Moses sennu maṅ din kan fit te ki siar be fanu. Ṽaan motana ti ji mək linba teent dindann nba chee na, ki li nie ki ti chat nakin Yennu. ²⁰ Ki Yennu bia sat mək ki pukin li paak. Yennu din tuu ki sat mək yoo nba ki bi kaant mannteeb na. ²¹ Ṽaan Yiisa din teen manntoo, yoo nba ki Yennu din sat mək ki beto a:

“Min Yennu sat mək ki ji kan lebit n dudukit, ki yet a

'Fine sii tee manntoo mōkmōk nan mōkmōk.' "

²² Li paak, Yiisa-e tee wunba wann nan molor nba chee na be ki kaa lotu.

²³ Ton, yaayoo ni mannteeb maᅇ din tuu tan kpoe, ki bi leeb na n mun gaar bi toona; li paak ki bi din yab. ²⁴ Ŋaan Yiisa ᅇarin sii yoo be-e, ki tee manntoo mōkmōk nan mōkmōk, ki u toona na kan mi nyi u nuu ni ki soo n gaarir. ²⁵ Li paak, binba chat nakin Yennu, ᅇoo Yiisa sann ni na, u saa fit tinnib motana nan yaayoo siiyoo, kimaan u be u manfoor ni yoo kur, ki mei Yennu ki teemm.

²⁶ Li paak, Yiisa-e tee ti manntoyudaano nba sommitit, taa loon bianinba. Ŋooe tee popeendaano, ki ki mōk bisiati; u be u kooe ki ki tee nan biitdamm na, ki Yennu donno ki gar Yendouᅇ ni teeb kur. ²⁷ Mannteyudaanleeb na din tuu mann maruᅇ daar n tuu daare bi tiouᅇ biit paak sinsinn, ki bia mann maruᅇ niib paak; ᅇoo Yiisa ki tee nna kaa; u din jii u moᅇ ki mann maruᅇ yomkooe, ki maruᅇ siar ji kaa. ²⁸ Moses sennu na tuu gann nisaariie ki teemm mannteeb yudamm, ki bi lek ki be fanu. Sennu maᅇ poorpoe ki Yennu din sat mōb nan u Bija Yiisa, wunba sii yoo be fanu mōkmōk nan mōkmōk, ki teeno manntoyudaano.

8

Yiisa-e tee ti manntoyudaano

¹ Barii na barnook want nan ti mōk manntoyudaano nba tee nna mun, ki kar Yennu nba mōk paᅇ kur na naangbouᅇ niidiitu po, Yendouᅇ ni, ² ki tuun mannteeb yudant toona

Yennu kasii yaa kasii boor; li kasii boore tee barmonii jiantu langbouŋ ki ti Yomdaano din ŋammir, linba ki tee nisaarik ŋammu.

³ Manntoo kur nba ki bi ganno, li tuu kpaa talase ki wun jii piinii ki bia mann maruŋ ki tur Yennu, nnae ki li mun kpaa talas ki ti manntoyudaano n tur siar. ⁴ Li-i bonni tee ki u be tingbouŋ na ni, u bo kii tee manntoo faba, kimaan mannteeb nba teen Yennu piinii, nan Juu teeb sennu nba tee biaŋinba na, poŋ be. ⁵ Baa tuun linba na tee Yendouŋ ni diiuk toona ninnauŋo; Moses nba din tun linba na naan nnae; kimaan Moses nba din yaa wun faa Yenjiantu lanbouŋ yoo nba na, Yennu din kpaano ki yet a, “A tun bonsiar kur nan maa wanna biaŋinba jooŋ na paak na.” ⁶ Ŋaan Yennu tur Yiisa mannu toona nba chee bi mannu toona na, nan u molor nba chee ki be Yennu nan nisaarii sinsuuk ni biaŋinba na, kimaan u molor maŋ gaa nan moŋona nba chee Moses yar nae.

⁷ Kimaan sinsinn molor na-i diŋi fit te ki nisaarii be fanu, li ji din bo kii kpaa talas ki Yennu n tur molor pukin taar munlee. ⁸ Ŋaan Yennu din la nisaarii biite yoo nba ki u yet a:
 “Min Yennu beeri a,
 yoo baat, ki n tan saa lor molorpaann nan
 Israel teeb
 nan Juda teeb.

⁹ Li tan kii tee nan molor nba ki n din lor nan bi yeejamm,
 yoo nba ki n kub bi nii ki nyinnib Ijipt tiŋ ni na kaa.

Bi din ki teen molor nba ki n lor namm na yada,

li paak, ki n baka din kaa bi po.

¹⁰ Min Yennu yet nan n saa senn molor nba nae
ki tur Israel teeb, daa nba baat na ni:
N ji saa teen n sennii maŋ bi dudukit nie,
ki sɔbir bi para ni.

Mine sii tee bi Yennu, ki bi tee n niib.

¹¹ Li ji kii kpaas talas ki bi sɔɔ n wann u loo koo
u ninja a,

‘Fini, bant Yennu,’ kimaan sɔɔ kur sii min,
laa nyii tarik ki saa tuu paarɔ.

¹² N tan saa nyik chab bi biit,
ki kan ban tiar bi yanbontoona po.”

¹³ Yennu nba pak molorpaann maŋ po nae, ki
sinsinn molor na teen molorkper; ki bonsiar
nba kpet ki kokir, li kan yukir ki li ji sii kaa.

9

*Ki jiin tingbouŋ na ni nan Yendouŋ ni
Yenjiantii po*

¹ Ton, Yennu nba din lor sinsinn molor ki
turib na, ki u bia turib sennii nba ki bi sii waar
kii jiantirɔ fanu; ki bi bia mɔk siaminba ki bi sii
jiantirɔ. ² Bi din faa bonkob-gbant lanbouŋo,
ki li mɔk paklooru nan linn po, ki yi paklooru
na kasii boor. Bi din senn fitire paklooru na
ni, ki teebul see leŋ, ki boroboro tɔɔ li paak ki
bi teen Yennu. ³ Li linn po na mun ki bi yi leŋ
kasii yaa kasii boor. ⁴ Salima binbintir din be,
ki bi jokit bonnunubit li paak ki teen Yennu,
ki Yennu molor lakir be, ki bi tabin salima li
kur po, ki salima bobir be lakir na ni nan jeet
nba yi mana na. Ki Aarɔnn patu nba din bint
fapaant na kpee lakir maŋ ni, ki tana ŋanlee

nba ki bi din jabir ki sennii sob li paak na kpee li ni. ⁵ Bonsia nba mək kpinkpant* din tɔɔ lakir maŋ paak, ki bi kpinkpant baak siaminba tee toonbiit nyikinhab boor na, ki li want nan Yennu be leŋ. Ŋaan mətana kaa tee yoo nba ki ti saa pak bont maŋ po nan li barnɔɔk kuri.

⁶ Bi din senn bona kur nnae, ki mannteeb tuu kɔɔ Yenjiantu lanbouŋ maŋ paklooru ni daar kur ki tuun Yenjiantu toona. ⁷ Ŋaan mannteeb yudaano kuukɔɔe din tuu kɔɔ lanbouŋ na linn po yomkɔɔ binn nɔɔk ni. U din tuu jii some ki tur Yennu, u mɔŋ toonbiit paak, nan niib nba tuu kpet tun biit na paak. ⁸ Yennu Seyeŋ din want Yenjiantu lanbouŋ na po fanu, a siaminba tee kasii yaa kasii boor na daa ki loot, yoo nba ki paklooru maŋ daa be na. ⁹ Linba na tee barjokite ki tur timm nba be mətana, ki want nan binba din jiantir Yennu na nba din tuu teenɔ bi piinii nan bi bonkobit sɔn nba na kan fit wuur bi para ni biit Yennu boor, ¹⁰ kimaan ŋann din tuu tee jeet nan bonnyunyuut nba kɔɔ nan linba ki kɔɔe, nan gbanant ŋammu po. Linba na kur din tee gbanant paak senniie a bii waar mək mək nan yoo nba ki Yennu tan saa senn u sennpaann.

¹¹ Ŋaan Masia, wunba tee sɔnŋanu na manntɔyudaano baara. Waa kɔɔ jiantu lanbouŋ nba ni ki tuun na tee lanbonjaann nba be fanu nan barmoniie; li ki tee nisaarik nba faa linba kaa, li bia ki tee tingbouŋ na ni yar kaa. ¹² Masia nba din saan kɔɔ jiantu lanbouŋ maŋ

* **9:5** 9.5 Bi maan ni, bi yib “cherubime”, ki bi naan bonkobit, ŋaan mək kpinkpant.

ni ki saa baar kasii yaa kasii boor yomkoo yoo nba, ki li gbenn nna, u din ki jii buunii nan naajai son kaa ki mann maruŋ, ŋaan u din jii u moŋ some ki pa ki nyinnit daabisin ni mōkmōk nan mōkmōk. ¹³ Bi din tuu jii buunii nan naajai some, ki bia jii naasar ki mann ki joo muu, ki jii li tanpent nan son na ki mii mii niib nba mōk yanbōmm Yennu tōonn na paak, a lin ŋamm bi gbanant ki bii yeen. ¹⁴ Linba na-i ŋamm gbanant, ŋaan Masia some mantik saa nyinn biit ti para ni ki tii waa manfodaano Yennu, kimaan Seyeen nba yoo be na paŋ nie ki ŋoo Masia jii u moŋ ki mann maruŋ nba be fanu fanu ki tur Yennu.

¹⁵ Li paak, Masia-e tee wunba ŋamii molor-paann na, a Yennu nba yiin binba na n la yiar sanpaapo mōkmōk nan mōkmōk, nan ŋoo Yennu nba lor na. Bi saa la yiar maŋ, kimaan Masia poŋ din kpowa; li paak, binba din tuun toonbiit yoo nba ki sinsinn molor daa din see na, u kuun maŋ nyinnib toonbiit maŋ tubdatu niwa.

¹⁶ Tōn, niro-i sob u fadinu gbouŋ, see ki bi tan wann nan wunba sob gbouŋ na kpowa, ¹⁷ kimaan yoo nba ki wunba sob fadinu gbouŋ maŋ daa be u manfoor ni na, gbouŋ maŋ ki mōk yiikoo. Li yiikoo be u kuun poorpoewa.

¹⁸ Li paake te ki sinsinn molor na din tuu mōk yiikoo son maruŋ poorpo. ¹⁹ Sinsinn, Moses din tuu moŋ Yennu sennu na kure nan laa sob bianinba na. Li poorpo wun jii dufatlai ki lor nan pekobmōnt ki pakii naajai nan buunii son nba ŋmat nan nyun na, ki miit sennu gbouŋ na paak, nan niib maŋ kur paak, ²⁰ ki beerib

a, “Molor nba ki Yennu senn turi a yin sakir na some na.” ²¹ Moses bia din tuu mii sɔn maŋ Yenjiantu lanbouŋ na paake, nan bona kur nba ki bi dia jiantir Yennu na paak. ²² Barmɔniie, Yennu sennu wannu ni, some din tuu ɣamm bont kur ki li be fanu ki ki mɔk biiti, ki sɔm-i kii nyii, Yennu kan nyik chab niib biiti.

Masia maruŋ nae kpeent biit

²³ Li paak, li din tuu kpaa talase ki bin mann maruŋ ki ɣamm bona nba tee Yendouŋ ni bona ninnauŋ na; ɣaan maruŋ nba chee na saa ɣamm Yendouŋ ni bona tiɔŋo. ²⁴ Nisaarik nba din ɣamm boor nba tee kasii ki nannir nan Yendouŋ ni bont nba tee li barmɔnii na, Masia din ki saan kɔɔ leŋ kaa, ɣaan u din saan kɔɔ Yendouŋ mɔŋ mɔŋ nie, siaminba ki u be Yennu tɔɔnn, ti paak na. ²⁵ Juu teeb mannteeb yudaano na din tuu kɔɔ nan bonkobit sɔn, siaminba tee kasii yaa kasii boor na yomkɔɔe, binn kur nɔɔk ni; ɣaan Masia ɣarin ki yaa wun mann maruŋ taar munɣaa kaa. ²⁶ Li-i diŋi bonni tee nnaie, ɣann laa din nyii durinya namu pinpiik niwa, u din bo saa di biak taar munɣaewa. ɣaan mɔtana, yoo nba per joontu na, ki u dɔkit a wun jii u mɔŋ ki mann maruŋ ki kpeen biit. ²⁷ Yennu senn a see ki niro kur n kpo yomkɔɔ, ki li poorpo ki wun bu u buut. ²⁸ Li paak, Masia nba din jii u mɔŋ ki mann maruŋ yomkɔɔ ki nyinn nisaarii bonchiann biit na tan saa jena, ki ji tan kan boi biit po kaa, ɣaan u tan saa tinn binba guu-u nan bi para kur nae.

10

¹ Juu teeb sennu na din tuu tee Yendouŋ ni bonŋana ninnauŋ nba din be sonu ki baat nae, ŋaan li din tuu ki tee li moŋ moŋ kaa. Li paak, binn kur maruŋ nba din ki gbent na kan fit teen binba baat nan maruŋ na kasii. ² Li maruŋ-i bonni fit ŋamm bi para, bi din bo saa mann yomkooe ŋaan ji nyik, ki biit ji kii waabi. ³ ŋaan binn n tuu binn maruŋ toona na kpan din tian niib na bi biit poe. ⁴ Kimaan naajai nan buunii son na kan fit nyinn biiti.

⁵ Li paak, Masia nba din yaa wun sik tingbouŋ na ni yoo nba na, u din bet Yennu a: “A ki loon maruŋ nan piinii kaa, ŋaan a ŋamm gbanante ki turin.

⁶ A ki mok parpeenn nan bonkobit nba ki bi mann maruŋ
ki jokitir muu, biit paak na.

⁷ Li paake te ki n din yet a,
‘Yennu, mine na, n saa tun a loomm
nan laa sob a gbouŋ ni ki yet n po bianŋinba
nawa.’ ”

⁸ Sinsinn, u din yet a, “A ki mok parpeenn nan maruŋ nan piinii, nan bonkobit nba ki bi mann maruŋ ki jokitir muu na, nan maruŋ nba ki bi tuu mann biit paak na kaa.” Bi din tuu mann maruŋ maŋ kura nan sennu nba wann bianŋinba nae. ⁹ Li poorpo ki u bia yet a, “Yennu, mine na, n saa tun a loomma.” Li paak, Yennu faa kpeen marunkpera kura, ŋaan jii Masia maruŋ na ki senn li seenu ni. ¹⁰ Yiisa Masia din tun linba ki Yennu loon wun tun nae, ki jii u gbanant ki mann maruŋ yomkoo ki te ki ti teen Yennu niib.

11 Mannbooryeŋ nba ki Juu teeb manntoo kur tuun daar n tuu daar na kan fit nyinn biiti. 12 Ŋaan Masia ŋarin din mann maruŋ yomkooe, linba mok yiikoo yoo kur, biit paak, ŋaan ŋmat doo Yendouŋ ni ki kar Yennu niidiitu po. 13 Leŋe ki u be ki guu mokmok nan Yennu nba tan saa teen u datai u taakpakita. 14 Li paak, ŋoo din mann marunyemmire ki te ki binba ki u nyinnib biit ni na be fanu yoo nba kaa gbennu.

15 Ki Yennu Seyeen mun bia teent u siara a:

16 “Yennu yet a

‘Maa yaa n turib molor nbae na daa nba baat na ni:

N tan saa teen n sennii bi para ni,

ki sobir bi dudukit ni.’ ”

17 Li poorpo ki u bia ŋamm yet a, “N ji kan mi tiar bi yanbomm nan bi biit po.” 18 Yennu nba nyik chab biit na, u ji ki loon marunsiar biit paaki.

Ti chat nakin Yennu man

19 N naa waas, Yiisa kuun maŋ paak ti mok parcheenn nan tin koo boor nba tee kasii yaa kasii na ni. 20 Yiisa gbanant nba tee sonpaanu nan sonu nba mok manfoor nae loot tammob maŋ. 21 Ti manntojaann nba yen Yennu ŋaak maŋ na paak, 22 ii ŋaan ki tin chat nakin Yennu man nan para nba be fanu, nan barmonii yada, ki daa mok birsuk, nan ti para nba ki Yiisa son nyinn dudukbiit li ni na, nan ti gbanant nba ki ti din wuur nan nyun nba kaa jakint na. 23 Ii ŋaan ki tii dia dindann nba ki ti fiit wann na fanu ki daa birisi, kimaan wunba din

senn mōsonn ki turit na tee barmōnii daanōe. ²⁴ Li ŋaan tin yabir ki fiin leeb lomm nan bi toonŋana, ²⁵ ki daa nyikit lakinu nan leeb, nan siab nba nyikit bianjinba na, ŋaan ii sommit leeb man, taa ji mantik laat ti Yomdaanō daar maŋ nba nyarii nakii bianjinba na paak.

²⁶ Taa bann barmōnii nba ki bi fiit wannit na, ti-i biaki ŋammit tuun toonbiit, marunsiar ji kaa ki saa wuur ti biit maŋi. ²⁷ Linba ji biar tee buut bunu nba mōk jaŋmaaniie, nan muchioŋ nba baat ki tan saa biir binba yêt Yennu na. ²⁸ Wunba din yêt Moses sennu na weiu, ki niib bann ki teen siaradamm banlee koo ki gar niib banlee, bi din tuu kpiu, ki ninbatinu kaa. ²⁹ Li paak, nirō nba fiak Yennu Bija maŋ ki ki baakit sōn nba ŋamm Yennu mōlor ki nyinnō u biit ni na, ki sukii burchinseyeeŋ na, bikint li yōō nba tan saa jaŋ nan tubdatu nba. ³⁰ Kimaan ti mi nan Yennu-e yet a, “Mine saa pa pann ki jiin biit.” U bia yet a, “Min Yennu-e tan saa bu n niib buut.” ³¹ Li tee jaŋmaansooruko nan sōō n kōō Yennu nba fo na wutoor ni.

³² Li tian man yoo nba gar na labaar; Yennu maŋ yentu nba din yent i paak na poor po, i din dii biak bonchiann, ŋaan li siar din ki nyannini. ³³ Sianyoo bi din tuu sukii-i paanu ni, ki daamii-i bonbiir, ki yenn yoo ki i tuu tan teen siir nan yin pukin binba ki bi tumm nna maŋ po, ki di biak namm. ³⁴ I din mōk ninbatinu nan binba be dansarii ni; ki sianyoo bi din tuu fat i yent, ŋaan ki i lek mōk parpeenn, kimaan i mi nan yaa mōk yent nba chee, ki bia ki mōk gbennu yaayoo. ³⁵ Li paak, i daa nyikit yabiru

mani, kimaan i yabiru na baat nan nyochioŋo.

³⁶ Li ŋan ki yii mək sukuru, ki fit tun Yennu loomm, ki la waa din senn mɔsonn a u saa turit linba na. ³⁷ Li sɔb Yennu gbouŋ ni a:

“Li tenn yoo waaminnae ki wunba baat na saa baar,
ki kan yukir nan baaru.

³⁸ Ŋaan n niŋamm na ŋarin tan saa teenin yada kii mək manfoor,
ŋaan bi yeno-i ŋmat poor, n tan kii mək parpeenn nano.”

³⁹ Timm ki tee nisiab nba ŋmat poor ki baa yann kaa, ŋaan ti teen Masia yada ki u tinnita.

11

Ki jiin yada po

¹ Yada tee, taa ki mək birsuk nan bont nba ki ti mək dindann li paak, ki mi nan linba ki ti ki laat nan ti ninbinn set be nae. ² Yennu din pak yaayoo ni niib na, bi yada paake.

³ Ti yada paake ki ti bann nan Yennu mɔmaame din nan durinya na, ki taa laat bona nba na, u din ki jii bonsiar kaa ki nanni.

⁴ Abel yada paake ki u din mann mannu tur Yennu, ki li mannu ŋan gar Keenn yar. U yada paake ki Yennu din pako ki puro yentinnɔ, kimaan ŋɔɔ Yennu din gaar u piinii nawa. Abel din kpowa, ŋaan u yada paake ki u bia lek daa piak.

⁵ Enok yada paake ki u din tan ki kpo, ŋaan ki Yennu jiiu ki doo nano Yendouŋ ni, ki sɔɔ ji ki lau; kimaan Yennu-e jiiu. Ki li sɔb Yennu gbouŋ ni a yoo nba ki Yennu daa din ki jiiu na,

ηῶῶ Yennu numm din gboouwa. ⁶ Niro-i kii teen Yennu yada, li yῶῶ kan fit penn ηῶῶ Yennu pari, kimaan wunba kur baat Yennu boor, li kpaa talas ki li yῶῶ n teen yada nan Yennu set be, ki teen binba loonῶ na nyῶῶt.

⁷ Nowa yada paake din te ki u gbat Yennu kpaanii ki jiin bona nba ki u daa kan fit lar nan u ninbinn na po. U din sak Yennu mῶb ki kpaa ηaringbenir, ki ηῶῶ nan u ηaateeb kῶῶ leη ki tinn. ηanne din wann nan tingbouη na niib mῶk biit; ηaan ki u yada maη paak ki Yennu din puro yentinnῶ.

⁸ Yada paake din te ki Abraham sak Yennu yiinii ki saan tiη nba ki Yennu maη senn mῶsonn a u saa turo na ni. U din nyik u mῶη dooe, ηaan saa siaminba ki u ki mi. ⁹ U yada paake ki u din saa tee saamῶ, tiη nba ki Yennu senn mῶsonn a u saa turo na ni. U din be bonkob-gbant lanbont nie. U waas Aisak nan Jakῶb nba din tan gaar Yennu mῶsonn na mun din be li biaηe. ¹⁰ Kimaan Abraham din guu a wun tan kῶῶ doo nba ki Yennu boῶn ki maa na nie, ki li dooe tee linba sii yῶῶ be.

¹¹ U ηapoo Sara din kpeta ki ji kan fit mari, ηaan ηῶῶ Sara yada paake ki u din tan soor poor ki mar, kimaan u mi nan Yennu nba senn mῶsonn na tee barmῶnii daanῶe. ¹² Li paak, Abraham nba din ji tan ki fῶk nan kuun na, ηaan u kuukῶῶ yaaboonae tan yab nan ηmaabira nba yab biaηinba na, ki bia yab nan mῶktanbiinii nba yab ki kaa kann biaηinba na.

¹³ Niib nba na kur din tuu tan kpo nan bi yadae, ηaan daa ki gaar Yennu nba senn mῶsonn a u saa turib linba na, ηaan bi yada

maṅ paak, bi din doṅ lar banfokirewa, kimaan bi din bann ki sak nan bi tee saamme, ki bia tee nitintaaka tingbouṅ na ni. ¹⁴ Niib-i yeen linba na, li set fiit ki want nan bi lek daa gorii bi tiṅ digbann siar poe. ¹⁵ Ki niib maṅ baka kaa baa poṅ din nyii digbansiar nba na po. Bi-i diṅi dukii li po, bi din bo saa fit ḡmata. ¹⁶ Ḥaan bi baka din be siaminba chee ki tee yendouṅ na poe. Li paak, Yennu mək yuugontir nan bin yiino bi Yennu, kimaan u poṅ din ḡamm dosaue ki guumm.

¹⁷ Yoo nba ki Yennu din bikin Abraham na, u yada paake ki u din jii u bija Aisak, a wun mann mannu ki tur ḡoo Yennu. Gotir, ḡoo Abraham nba din gaar Yennu mōsona maṅ na, ḡooe bia din jii u biyemmir a wun mann mannu ki tur Yennu. ¹⁸ Yennu din yeto a, “Aisak nie ki a tan saa la yaabona nba ki n senn mōsonn a n saa tura na.” ¹⁹ Ki Abraham ji bann nan Yennu fit fiint niib kuun ni; ki li set want nan Abraham din gaar Aisak kuun nie.

²⁰ Aisak yada paake din te ki u senn mōsonṅann nba yaa lin tan baar Jakob nan Esōo paak.

²¹ Yoo nba ki Jakob din yaa wun kpo na, u yada paake din te ki u teen piisin Joosef bonjai na paak, ki din tan diin u patu ki jiant Yennu.

²² Joosef manfoor nba din tan yaa lin gbenn yoo nba na, u yada paake ki u din pak Israel teeb nyinu po Ijipt tiṅ ni, ki wannib baa tan saa teen u kpaba bianinba.

²³ Moses baa nan u naa nba din maro yoo nba ki la ki u fan bonchiann na, bi yada paake

ki bi din boro ki tan jaŋ ŋmaarii ŋantaa, ki din ki jee bat sennu na.

²⁴ Moses nba din tan kpaat yoo nba, u yada paake ki u din ki sak bii yiu Bat Faaro bipoo bija. ²⁵ U din sak nan wun di biak nan Yennu niibe, ŋaan ki ki sak toonbiit parpeenn nba tee waamina na. ²⁶ U din dukin a bi-i sukiiɔ Masia paak, li mɔk nyoot bonchiann ki chee Ijpt tiŋ ni mɔkint kur, kimaan u ninbinn din kpaɔ nyoot nba baat na paake.

²⁷ ɪɔɔ Moses yada paake din te ki u nyii Ijpt ki ki jee bat na wutoori, ŋaan lek saa toonn nan u set la Yennu nba ki soɔ ki laato nan ninbinn nae. ²⁸ U yadae te ki u din piin yukitgar jaamm, ki senn sennu a bin mii soɔ bi ŋei tammɔi paak, ki kuun malaka na tan daa kpi Israel teeb bijakpera.

²⁹ Israel teeb yada paake ki Mɔkmun na din bokit ki teen tinkooŋ ki turib ki bi poot, ki Ijpt teeb na mun yabir a bin poot, ŋaan ki mɔkir maŋ nyun jiin mubin ki diib.

³⁰ Israel teeb nba din tan baar Jeriko yoo nba, bi yada paake ki bi din somm lint li joona daa ŋanlore, ki li baa. ³¹ Poochonchonn nba ki bi yiu Rahab na yada paake din te ki Israel teeb ki kpuii, ŋaan kpuii binba din ki gbat Yennu mɔb na, kimaan Israel niib nba din baar a bin diis doo maŋ na, ŋooe gaarib saauŋ.

³² N bia beti siab labaar ki pukini-i? Yoo-i bonni yab, n bo saa beti Gideonn labaar, nan Barak labaar, nan Samsonn labaar, nan Jefta labaar, nan Defid labaar, nan Samuel labaar, nan Yennu sokiniinba labara. ³³ Bi yada paake ki bi siab din kon nyann tinii,

ki siab mun tun linba tee fanu, ki siab mun gaar Yennu mōsona, ki siab soor yanbōra mōi, ³⁴ ki siab mun kpeen muchioŋ, ki siab tin nyii jukbanjai kuun ni. Ki siab mun tee tariie ŋaan din tan kpant paarib, ki siab mun took tōbii nan paŋ ki te ki boorganu lanjimanba chiar. ³⁵ Ki poosiab la bi nikpiimm nba din kpo na fiir kuun ni.

Ki siab nba din teen Yennu yada na paak ki bi boo kpiib, ki bi ki yēt Yennu weiu a bin nyi kuun maŋ ni, kimaan bi loon bin fiir kuun ni ki la manfoor nba chee. ³⁶ Ki niib din daan siab nyatuk, ki bia boob kpaasir; ki bi baan bi siab jarit, ki jiib saan kōomm dansarii. ³⁷ Bi din jaat bi siab tanae, ki ŋma bi siab ki poriiib; ki bi jikit jukbanjai ki kpi bi siab; ki leeb din lia pegbant, ki leeb bia lia bugbant ki lin namu, ki niib mukisib ki dintib biak. ³⁸ Tingbouŋ na teeb din ki jaŋ nan bii be nammi. Ki bi din lin yeek kunkoot paak nan kunkona ni, ki lin dōo tanfiat nan fōrii ni.

³⁹ Binba na kur yada paake ki Yennu din pakib, ŋaan ki bi daa ki gaar linba ki u senn a u saa turib na, ⁴⁰ kimaan ti paake ki u din mantik dukii bonsiar nba chee na po, ŋanne ki u saa te ki timm nan ŋamm n tan lakin kii be fanu nan barmōnii.

12

Ki jiin ti Baa Yennu po

¹ Binba na kur tee siaradamme ki lintit. Li paak, ii ŋaan ki tin yabir ki fok lu linba kur saa gōorit Masia sōnu ni, nan biit nba saa soorit; ii ŋaan man ki tii di sukuru ki gbaa gbaar nba

yaa lin baarit na. ² Ŋaant ki tin kpan kpaa ti ninbina Yiisa paak; ŋoɔe ki ti yada gaa u paak li pinpiik niwa nan li joontu na ni. Dapunpunn na din ki te ki u nyik yabiru. Parpeenn nba din baat u paak na paak, u din ki dukin ki li moko fei nan wun kpo li dapunpunn paaki, ŋanne te ki u ji kar Yennu naangbouŋ paak, u niidiitu po motana.

³ Ii lek bikin waa din gaar naŋ biitdamm boor bianŋinba. Li paak, i daa te ki i gbanu baŋit ki i nyikit yabiru. ⁴ Yaa yabii ki kon nan biit na, ŋaan i soo daa ki mi yabir ki li saa baar kuumi.

⁵ I ki tian Yennu nba kpaani, nan baa nba tuu kpaan u waas bianŋinba na-a? Li sob a:

“N bik, Yennu-i teena kpaanii yoo nba, fan gbiint,

li-i tee ki u dat a tubir, faa daa nyikit a yabiru,

⁶ kimaan Yennu kpaan wunba ki u loonɔe,

ki wuu gaar wunba ki teenɔ u bik,

li yooe ki u daar u tubir.”

⁷ Yabit i fardinu ni nan bik nba ki u baa tuu dat u tubir ki wun di fara bianŋinba na. Yennu-e teeni tubdatu, yaa tee u waas na paak, kimaan bik kaa ki ki laat tubdatu u baa boori. ⁸ Li-i tee ki u ki dat i tuba nan waa tee u waas kur bianŋinba na, ŋann li want nan i tee kpenŋmiae,

i ki tee u waas kaa. ⁹ Ti baanba nba be tingbouŋ na ni daar ti tubae, ki ti teemm baakir. Li paak, li ŋan ki ti mantik sikin ti moŋ ki tur ti baa Yennu nba be Yendouŋ ni na, ki la manfoor. ¹⁰ Ti baanba nba be tingbouŋ na ni jikit yoo waaminna ki daar ti tuba baa loon bianŋinbae, ŋaan Yennu ŋarin daar ti tuba,

ti moŋ sommir paake, a ti binbeŋ n ŋamm kii

yeen nan ḡoṵ Yennu binbeṅ na. ¹¹ Tubdatu yoo tone, li ki mək parpeenni, ḡaan li poorpoewa, ki binba dii tubdatu fara na ji tuu la nyoot nba tee parmaasir nan yentinu binbeṅ.

Kpaanii

¹² Li paak, kakitir i dunkpeena, ki chekin i nii nba baṅ na, ¹³ kii tok sɔnu nba took, ki wunba ki waa barmɔnii na n set fanu ki daa baa.

¹⁴ Yabit kii mək parmaasir i leeb sinsuuk ni, kii mək binben-yeṅ, kimaan sɔo-i kii mək ḡann, li yoo tan kan la ti Yomdaano. ¹⁵ Ii chek man ki tan daa kɔṅit Yennu ninbatinu na. I sɔo daa mək tonu u par ni, ki li tonu na n baar nan parbiir leeb paak, ki biir niburchioṅu. ¹⁶ I sɔo daa chommi, koo ki gorii Yennu barii yann ki tee nan Esɔo, wunba din jii u saakatuk ki kpent jeet ki dii yomm na. ¹⁷ I mi nan li poorpo, u din tan loon wun gaar u baa mɔsonḡann ki mɔ nan ninnyuut, ḡaan ki lar, kimaan u ji din ki la sɔnu nba ki u saa tokin ki lebit waa poṅ biir linba na.

¹⁸ Tɔn, yimm ki baar bonsiar nba ki i saa fit siir, nan Israel teeb nba din baar Sainai jojaann boor na kaa, siaminba ki muchioṅ di, ki bunbɔnchioṅ be, ki wonpaaruk da, ¹⁹ ki naatunn mɔ, ki kunkɔr pak na kaa. Baa din gbat li kunkɔr yoo nba, bi din jak baruṅo ki ji ki loon li kunkɔr n pak pukini, ²⁰ kimaan sennu nba ki bi gbat na paak bi niiwa. Li din yet a, “Bonkobuk-u lekii sii jɔɔr maṅ gbaa, bin jaato tana ki kpiu.” ²¹ Li boor din mək jaṅmaansooruk bonchiann, ki Moses yet a, “Jaṅmaanii mokin, ki n gbanant jekir.”

²² Ɔaan yimm ɣarin baar kunkonn nba sann tee Sayonn, linba tee manfodaano Yennu doo, ki tee Yendouŋ ni Jerusalem, siaminba ki malakanba tusaa tusaa lakin nan parpeenn nae. ²³ Yimm tan baar niib nba ki Yennu teemm u waas, ki bi sana sob Yendouŋ ni na boore. I baar Yennu nba tee nisaarik kur barbuuro na boore, nan popeendamm nba ki Yennu te ki bi sei be fanu na boor. ²⁴ I baar Yiisa, wunba tee sindantinno na boore, ki bia baar Yennu molorpaann na boor. Ki u son nba din nyii na want barii nba ɣan ki gar Abel son yar.

²⁵ Li paak, ii mi man ki i yêŋ Yennu nba kpaani na mob, kimaan Israel teeb nba din yêŋ wunba din kpaamm tingbouŋ na ni mob na, Yennu din tan ki nyik bi tubdatu; ki ti-i yêŋ kpaanii nba nyii Yendouŋ ni na, ti tan saa teen nlee ki nyi tubdatu ni? ²⁶ Li yoo na, Yennu kunkor din nik tingbouŋ nae, ɣaan motana u senn mosonn ki yet a, “N ji kan nik tingbouŋ na kuukoo kaa, ɣaan n tan saa nik tingbouŋ na nan sanpaapo kurewa.” ²⁷ Mobona nba yet a, “N ji” na, li fiit want nan bonnankara kur tan saa nik ki mir bote, ɣaan linba tan kan fit nik na ɣarin tan saa biar be-e.

²⁸ Li paak, taa gaar naan nba kan mi ki nik na paak, ii ɣaan ki tii teen Yennu niipoouk man, ki jianto nan baakir nan jajmaanii ki u numm n gboo, ²⁹ kimaan Yennu maŋ tee nan mudikau nae.

13

Ki jiin toona nba pent Yennu par po

¹ Yaa tee Masiaweira na paak, ii loon i leeb man yoo kur. ² I daa tammit saamm gaaru po, kimaan nisiab din tan gaar malakanba saauḡ, ḡaan ki ki mi a bi tee malakanbae. ³ Ii tian nisiab nba be dansarii ni na po, nan yimm nan ḡamme lakin be li ni na; kii tian nisiab nba laat mukisuk na po, kimaan i mun daa be tingbour na nie nan i gbanant.

⁴ Ii mək baakir nan i leeb, i pookoont nan i jakunt ni, ki daa chommi, kimaan Yennu tan saa dat bonchonchona nan joonbaarit nan sapaanwobira nan naasinwobira tubawa.

⁵ Ii nyinn i niḡḡ liklomm ni, ḡaan te ki i numm n gboo yaa mək linba; kimaan Yennu yet a, “N kan mi ki nyikani, n bia kan mi ki ḡaanani.” ⁶ Li paak, ḡaant ki tii mək parcheenn ki yet a: “Yennu-e tee n sommtə, n kan tin jaḡmaanii, nisaarik saa teenin bee?”

⁷ Ii tian man i yudamm nba din tuu piak Yennu maan ki teeni na po; kii dukii bi binberḡ nyoot nba tee bianḡinba, kii tokii bi yada. ⁸ Yiisa Masia nba won tee bianḡinba wonn na, u bia tee nnae dinna, u bia sii tun tee nnae mək mək nan mək mək. ⁹ I daa ḡaant ki wannaanbooru booru n boonini, ki i tan saa mann tut sonḡanu maḡ. Li ḡan ki Yennu sommir n tur niro paḡ u par ni; jeet sennii nba jiin jeet dinu po weiu kan turo paḡi. Nisiab nba dia jeet sennii na poḡ ki laat sommsiar li ni.

¹⁰ Tən, binba mann mannu Juu teeb Yenjiantu boor na ki mək yaak nan bii di linba be ti maruḡ binbintir na paaki. ¹¹ Ki Juu teeb mannteeb yudaano tuu kəə nan bonkobit son

Yennu diiuk ni, kasii yaa kasii boor na, ki mann maruŋ biit paak, ŋaan joo bonkobit maŋ nant muu bi doo na kpiŋ po. ¹² Li paak ki Yiisa mun din kpo doo na kpiŋ, a wun nyinn niib bi biit ni, nan u moŋ sɔn. ¹³ Li paak, ŋaant ki tin nyi ki saan u boor man, ki sak di fei nano. ¹⁴ Kimaan doo nba saa biar kaa tingbouŋ na ni; dosau nba baat nae ki ti guur. ¹⁵ Li paak, ii ŋaan ki tii dontir Yennu yoo kur Yiisa sann ni; paku nba nyi ti moi ni nae tee mannu ki turɔ. ¹⁶ I daa nyikit toonŋana tumu, kii chentir yaa mɔk linba nan i leeb. Li maruŋ boorue pent Yennu par.

¹⁷ Ii saak i yudamm moi ki sikin i moŋ ki turib, kimaan bi baka be i benu ni, kimaan bi tan saa wann Yennu bi toona nba ki bi din tuun nawa. Ŋaant ki bin tan wannɔ nan parpeenn, ŋaan tan daa wantɔ nan parbiiri. Ŋann tan kii mɔk nyɔt ki turini.

¹⁸ Ii mei Yennu man ti paak. Ti ki mɔk dudukbisiat ti toona ni, kimaan ti loon tin tun linba tooke yoo kur. ¹⁹ Ŋaan n mantik barimie, ii mei Yennu man kii teenin ki wun te ki n jen i boor mɔtana.

Yenmiarjoontik

²⁰ Yennu nba teent parmaasir nae din fiin ti Yomdaano Yiisa kuun ni. Ŋɔɔ Yiisa-e tee ti guutojaann, kimaan u din kpo, ki u sɔn ŋamm Yennu mɔlor nba sii see mɔkmɔk nan mɔkmɔk na; ²¹ ŋɔɔ Yennu n ŋamm i binbeŋ fanu ki yii tuun u loomm, kii tuun toonŋana kur. Yiisa Masia paak wun te ki tii tee binba sii pent u

par. Ɔɔɔe yen dontir mɔkmɔk nan mɔkmɔk.
Mamɔmm.

Mɔbonjoontii

²² N naa waas, n barimie, ii di sukuru ki gbiint kpaanii na; kimaan maa sɔb gbouŋ nba turi na ki fɔki. ²³ N loon ki yin bann nan bi nyinn ti naa bik Timoti dansarik niwa. Li-i tee ki u baar n boor daa na ni, i saa la min nan Ɔɔɔ.

²⁴ Ii foont i yudamm kura nan Yennu niib na kura ki turit. Ti naa waas nba nyii Itali tiŋ ni na foonti.

²⁵ Yennu ninkpabaŋ-ii be nan i kura.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d